

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/KANTON SREDIŠNJA BOSNA
KANTONALNI SUD U NOVOM TRAVNIKU
Broj: 06 0 K 020957 25 K
Novi Travnik, 20.01.2026. godine

U IME FEDERACIJE BOSNE I HERCEGOVINE !

Kantonalni sud u Novom Travniku u vijeću sastavljenom od sudija Edvina Kokić kao predsjednika vijeća, te Lazarele Porić i Denisa Trifković, kao članova vijeća, uz sudjelovanje zapisničara Slađane Dujo, u krivičnom postupku protiv optuženog Z. S., zbog krivičnog djela „Ubistvo“ iz člana 166. stav 1. u vezi sa članom 28. Krivičnog zakona Federacije Bosne i Hercegovine („Službene novine Federacije Bosne i Hercegovine“, broj 36/03, 37/03, 21/04, 69/04, 18/05, 42/10, 42/11, 59/14, 76/14, 46/16, 75/17, 31/23, 58/25), po optužnici Kantonalnog tužilaštva Travnik broj: T06 0 KT 0034530 24 od 26.05.2025. godine nakon javnog glavnog pretresa okončanog dana 16.01.2026. godine, u prisustvu Kantonalnog tužitelja Frane Marjanović, optuženog Z. S. i branitelja optuženog Mesuda Duvnjak advokata iz Bugojna, po obavljenom vijećanju i glasanju, donio je i u prisutnosti optuženog Z. S., dana 20.01.2026. godine, javno objavio sljedeću:

PRESUDU

Optuženi: Z. S. sin F. i majke N. dj. D., rođen godine u S., nastanjen u ul. S. A. br. ..., B., državljanin BiH, JMBG: ..., pismen, SSS, po struci električar, zaposlen u ugostiteljskom objektu L. B., B., oženjen, otac troje djece, vojsku služio, ne vodi se u VE, srednjeg imovnog stanja, protiv istog se ne vodi drugi krivični postupak, osuđivan,

KRIV JE

što je:

dana 18.9.2023. godine, oko 01:20 sati, u mjestu Č., općina Bugojno, nakon prethodne verbalne prepirke sa oštećenim A. G. u ugostiteljskom objektu „B.“, otišao do svog vozila koje je bilo parkirano ispred objekta i iz istog uzeo kesu u kojoj su se nalazili kovani novac i nož, te se vratio u navedeni objekat, a zatim u namjeri da oštećenog A. G. liši života, držeći nož u desnoj ruci prišao za stol oštećenog te prilikom međusobnog naguravanja zamahnuo nožem i zadao oštećenom A. G. jedan ubod u predjelu stomaka/abdomena usljed čega je oštećeni pao na pod i na taj način oštećenom A. G. nanio opasnu po život tešku tjelesnu ozljedu u vidu: ubodno reznih rana u predjelu desne slabinske regije i 11-og rebra, te donjeg pola desnog bubrega i uzlaznog dijela debelog crijeva, što je kasnije rezultiralo hirurškim formiranjem unipolarnog anus pretera, svjestan da koristeći nož i ubadanjem oštećenog u predio stomaka/abdomena može oštećenom nanijeti smrtonosne povrede i htijući to, nakon čega je napustio navedeni objekat,

Dakle, pokušao drugoga usmrtiti,

čime je počinio krivično djelo „Ubistvo“ iz člana 166. stav 1. u vezi sa članom 28. Krivičnog zakona Federacije Bosne i Hercegovine,

pa ga sud temeljem istog člana i uz primjenu odredbi članova 42., 43., 49. stav 1. i 3., 50. i 51. stav 1. tačka b) Krivičnog zakona Federacije BiH

OSUĐUJE

na kaznu zatvora u trajanju od 3 (tri) godine.

Temeljem člana 202. stav 1. Zakona o krivičnom postupku Federacije BiH optuženi Z. S. se obavezuje da naknadi troškove krivičnog postupka u iznosu od 453,64 KM, a koji se odnose na paušalne troškove i troškove medicinskog vještačenja u roku od 15 dana po pravosnažnosti presude, kao i naknaditi troškove službene odbrane čiju visinu će sud utvrditi posebnim rješenjem kada za to pribavi potrebne podatke.

Zapisničar
Slađana Dujo

Predsjednik vijeća
Edvin Kokić